



UNIVERSITÄTS-
BIBLIOTHEK
PADERBORN

Universitätsbibliothek Paderborn

Historiae Ecclesiasticae Pars ...

Historiae Ecclesiasticae Pars Secvnda, Qva Continentvr Socratis Scolastici
Constantinopolitani lib. 7. Theodoriti Cyrensis episcopi lib. 5

Christopherson, John

[Köln], 1569

De sancto Iuliano, & Antonio magno. Caput. XXV.

urn:nbn:de:hbz:466:1-12704

imperiatori parandum se contulit. Cumque ingressus esset, repente de potestate mentis deturbatus, in aquam calidissimam minimeque temperatam se precipitavit, illicoque obiit mortem. Imperator autem sedens, illum expectat, uti indicet, quando in balneum intrandum sit. Vbi verò multum temporis præterierat, alios mittit, qui moræ causam ei significent. Hi ingressi in balneum, cum omnia intus loca oculis lustrassent, tandem offendunt hominem in aqua feruente minimeque temperata mortuum, corpusque eius ardore dissolutum. Qua re imperatori nunciata, didicere omnes quantum ponderis Aphraatis haberet oratio. Attamen de impia sua doctrina minimè desiterunt, sed more Pharaonis cor suum indurarunt: ipseque ille imperator, quamuis cognito sancti viri miraculo obstupesceret, non tamen eius furor contra pietatem incitatus confedit.

De sancto Iuliano, & Antonio magno.

Caput. XXV.

Eodem tempore ille famæ celebritate insignis Iulianus, cuius supra mentionem feci, & relinquere solitudinem, & Antiochiam venire coactus est. Nam cum Ariani, educati mendaciis, & ad calumnias contexendas valde parati, magnum illum virum suæ sectæ fauere constanter affirmarent, tria veritatis luminaria, Flavianus, Diodorus, & Aphraates, Acacium strenuum virtutis athletam, qui postea ecclesiam Berœensem valde sapienter gubernabat, Mittunt ad Iulianum, virum omni genere laudis præstantem, oratum, uti in infinitam hominum multitudinem misericordem se præbeat, aduersariorum de se confictum mendacium coarguat, doctrinam denique veritatis confirmet. Huius quidem miracula, quæ tum abeundo, tum reuertendo, tum denique in amplissima illa vrbe edidit, sunt à nobis in historia nostra, quæ Philotheos dicitur, literarum monumentis mandata: quam historiam, qui has res accuratè cognoscere desiderant, poterunt pro arbitratu perlegere. Quòd autem totam ciuitatis multitudinem ad conuentus nobiscum agendos conciliarit, neminè arbitror in dubium vocaturum, si modo humanam naturam diligenter

NN 5

THEODOR. HISTOR.

diligenter confyderet. Nam res admirabiles & præter oīm opinionem, omnes ad se pertrahere solent. Atque quòd iste miracula planè eximia edidit, testes sunt illi ipsi veritatis aduersarii. Idem ipsum iam pridem temporibus Constantii, ab Antonio magno Alexandriæ factitatum est. Nam relicta solitudine, totam illam circuibat urbem, quòd omnes doceret, tū Athanasium preconè veritatis, tū Arianos veritatis hostes esse. Itaque non ignorabant illi sancti viri, quæ res cuiq; temporì essent accommodatæ, & quâdo solitudinis orium esset amplectendum, quando rursus urbana negocia quieti solitaria præferenda.

Quinam alij monachi hoc tempore celebres existerint. *CAP. XXVI.*

ERant etiam eodem tempore alii vitæ monasticæ disciplina valde præstabiles. Nam in solitudine Chalcidensi Abitus, Martianus, Abraames, & alii præterea non pauci in corporibus perturbationibus obnoxii vitæ ab omni perturbatione vacuam traduxerunt. In Apamea item Agapetus, Symeones, Paulus, & alij in eo vitæ genere facile primas tulerunt. In solitudine porrò Zeugmatensi Publius & Paulus. In Cyrestensi quoque vir ab omnibus laudatus Acepsemas, se conclusit in cellulam, & eum vitæ modum sexaginta annos continuos transegit, neque visus à quoquam, neque cuiquam locutus. Adde his Zeugmatiū, virum cum primis admirabilè: qui tametsi luminibus orbatuſ erat, tamen circuibat sedulo, quòtum confirmaret oues, tum lupos dimicando profligaret. ob quam causam cellula eius monastica incensa fuit: alteram tamen Trajanus, dux fidelissimus, ei ædificauit, aliàsque res ad cultum vitæ necessarias impertiit. In solitudine etiam Antiochena, Marianus, Eusebius, Ammianus, Palladius, Symeones, Abraames, & alij quoq; qui imaginè dei ad cuius similitudinem cõditi erant, integrâ conseruarunt. Atq; tum horū, tum illorū vitâ scriptis prodidimus. Itèque mons, qui vrbi illi amplissimæ imminet, huiusmodi floribus pratensibus pulchrè vestitus est. Nam in eo cum magna nominis celebritate vixit Petrus Galata, & eius gentilis